

Otvorena planinarska kuća Vrutak na Prenju

22 June 2009

Najatraktivnija bh. planina dobila je novi objekat koji će služiti planinarima i posjetiocima. Povodom 60. godišnjice postojanja Planinarskog društva Boranica iz Konjica te istovremeno i povodom Dana opštine Konjic upriličeno je svečano otvorenje pl. kuće Vrutak koja se nalazi u vrhu doline Tisovica ispod prenjskih velikana Otišća (2093 m) i Zelene Glave (2123 m).

Ovom skupu je prisustvovalo oko sedamdeset planinara iz Konjica i drugih mjesta, a među njima i 86-godišnji Ferdo Žagovec koji je jedan od osnivača PD Boranice 1949. godine i ujedno njen prvi sekretar. Intenzivniji radovi na kući traju posljednje dvije godine pri čemu su članovi PD Boranice, uz materijalnu pomoć opštine i drugih konjičkih institucija i pojedinaca, iznijeli najveći dio tereta izgradnje i opremanja kuće. Ne treba posebno naglašavati od kolike je važnosti ova kuća za planinare koji pohode ovu prelijepu ali i surovu planinu. Također, kuća posjeduje vodu koja je dovedena sa udaljene lokacije pod Otišem te omogućuje boravak i spavanje za oko 15-ak planinara istovremeno. Pozicija kuće omogućava planinarske ture na većinu najviših prenjških vrhova što je dosada bio nedostatak obzirom da kuća na Jezercu uništena u ratu. Međutim, vrijedni entuzijasti su i ovu kultnu kuću bh. alpinizma su doveli pred samo otvorenje. Time će se jugoistočna, a neki kažu i najatraktivnija, strana Prenja uvezati za organizaciju višednevnih tura i u zimskom periodu.